


PAN-EVROPSKI UNIVERZITET
"APEIRON" BANJA LUKA
Broj: 2205 / 12
Datum: 19.08.2012. godine



ULJARI

(Ili velike tajne malih majstora kuhinje...)

Sejate se možda kako sam na ovom mjestu svojevremeno napisala da se ljudskoj gluposti i ljudskom bezobrazluku nikada ne treba čuditi? E, dragi moji, naši političari toj maksimi daju još dublju dimenziju. Naime, tamam što pomislite da ste sve vidjeli i da je potpuno amatersko, kleptomansko vođenje politike dotaklo dno, život nas, nažalost, demantira. Ubrzavanjem kampanje za lokalne izbore, nadlagivanje je doseglo takve razmjere da više nema potrebe ni upozoravati na to, jer je bilo koja pametna riječ u ovom toksično-amaterskom medijskom okruženju potpuno besmislena. Žalosna je istina, bojim se, da velika većina građana BiH nema ni najmanju predstavu o čemu se u stvari radi, a kamoli da li ih upaljeni dušebrižnici lažu ili ne... Evo, recimo *Konjuh* i *Krivaja* kao dva tipična primjera kako *Vlast* (ne)rješava probleme. Uredno je naš *Broj 2* primio predstavnike *Konjuha* tek kada su oni - onako revolucionarno i marksistički - blokirali dva-tri magistralna puta. Odjednom se nađeše i 2,5 miliona KM za kupovinu vremena, a da se ne lažemo, i glasova. Ili što bi rekao Goran Bregović u onoj pjesmi "makeup na leš" - ili tako nekako...

Obišao je naš ekspert i *Krivaju* i tamo onako drugarski poručio da je *Vlada* neće ostaviti!!! Rekla bih, nažalost, izgleda da neće. I dok god ih bilo koja, a pogotovo ova *Vlada*, brani i hrani - niti će ih odbraniti niti će ih nahraniti... Ali ono što je istinska katastrofa jeste politička kultura kanibalnog tipa koju je vlast uvela na ove prostore. Naime, da bi se održali na vlasti, političari su spremni pojesti sopstvenu državu za čije se uzde bore. Sve se politizira i relativizira. Kada se nekome iz vlasti ne sviđa zakon, jednostavno ga ignorira. Kada im se ne sviđa neka zakonita odluka, oni je jednostavno ne provode, jer ju je donio "njihov" ministar. Itd.itd. Potreban i dovoljan uslov za to je imati "svoje" tužioce, a ponekad i sudije koji će vas amnestirati ili bar suditi "ispravno" - što će reći u vašu korist. Ako nije tako, onda su nesposobni, onda ćemo ih blatiti na konferencijama za štampu i prijetiti smanjenjem plaća. A ako i to ne pomogne, onda ćemo izvesti narodne i (pred)revolucionarne mase na ulice da provode revolucionarnu pravdu..

Jer, rekoh na početku, ovi vode "ULJNU" politiku koja glasi: nije važno što ćemo sve potopiti, bitno je da smo mi kao ulje - da plivamo po vrhu.... **B**

Aida Delić,
glavna i odgovorna urednica